



partii naleraq

25.april 2016

UPA2016/52

Danmarkimi politini pisartutut Kalaallit Nunaanni politiit nalunaaruteqartoqarneraniit qisuariarnissap tungaanut piffissamik atorneqartartumik nalunaarsuisalernissaat pillugu Naalakkersuisut danskit inatsisunik atortitsinermut ministerianut attaveqaqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Justus Hansen, Demokratit)

Inatsisartunut ilaasortaq Justus Hansen Demokratit politiit nalunaaruteqartoqarneraniit qisuariarnissap tungaanut piffissamik atorneqartartumik nalunaarsuisalernissaat pillugu aalajangiiffigisassamik siunnersuuteqarpoq taannalu oqaaseqarfigilaassavarput.

Nunatsinni pinerluuteqarnerit, aammalu ilaatigut tillinniarnersassuit, annersaernerit, meeqqanik atornerluinerit, assorujussuaq ingasattumik naliginnaapput kangunarluunilu, taamatullu ingerlaaseqarneq soorunami toqqissisimanangilaq akuersaarneqarsinnaananilu.

Pissutsit politiinit innuttaasunut sullissinermi pitsaanngorsaanissat sutigut tamatigut siuarsarlugit tapersersortariaqarput, tassami pinerluffigineqartut sukkasuumik ikiorsiiffigineqartarnissaat pingaaruteqartoq tamatta ilisimavarput, aammalu toqqissimanarnerusarluni nalunngikkaanni ikiortissanik aggertoqapallassinnaasoq, taamatullu aamma pinerlunniat ikilisinneqarsinnaanerit pinerliiniarnerullu pinaveersaartinneqarsinnaanera anguneqarsinnaammat.

Massakut sinerissami Nuup avataani najugaqarluni politeqarfiup ammanerisa avataani aamma tamatigut Nuummut saaffiginnittarneq ilumut pissusissamisoorneq apeqqutigisariaqarparput.

Tassami assersuutigalugu Politeqarfimmut nammineq najukkami saaffiginnikkaanni suliffiup avataani oqarfigineqartarput Nuummut sianerniarit, taava Nuummi nalilersoreerpassuk susoqassanersoq uterfigineqarumarputit.

Pissutsit taamatut ingerlanerat soorunami toqqissisimanangilaq, taamaattumik Justus Hansen-ip siunnersuutaa politiit qisuariarnissap tungaanut piffissamik nalunaarsuisarnissamik saqqummiussaqaqarnera taperserparput, taamaaliornikkut aamma innuttaasut sullinneqarnerat isumannaanerusumut inissinneqarsinnaammat.

Nunaqarfinni ilaatigut kommunefoged-qanngitsuni suli pissutsit ilungersunartumik pitsaanngitsorujussuarmik inissisimasarput allaat isumannaatsuunissamik inatsisunik illersorneqarnissaq ilaatigut naatsorsuutigineqarsinnaanani.

Nunaqarfiullu attavigisaanut Illoqarfimmut politiinut saaffiginnikkaani aamma sukkanerpaamik orniguttoqarneq ajorpoq, tamannalu toqqissimanangilaq, oqartussaaffimmi Naalagaaffiup ingerlataa taamatut ingerlanneqarnera toqqissimanangilaq akuersaarneqarsinnaanilu, taamaattumik pitsaanerulersinneqarnissaa piumassarissallugu ingasattajaarnerunngilaq.

Taamatut oqaaseqarluta Justus Hansen-ip siunnersuutaa tamakkiisumik taperserparput, inatsiseqarnermullu ataatsimiititaliami suliarineqarnissaa innersuussutigalugu.